



JUDICIAL SYSTEM MONITORING PROGRAMME
PROGRAM PEMENTAUAN SISTEM YUDISIAL



Komunikadu Imprensa

Edisaun : Agustu 2011
Publikasaun : Agustu 2011

JSMP Kontinua Hala'ó Treinamentu ba Lideransa Komunitária iha Distritu Ermera no Covalima

Iha loron 11 fulan Agostu 2011, *Judicial System Monitoring Programme* (JSMP) liu husi Unidade Aisitensia Legál ba Vítima ka *Victim Support service* (VSS) realiza treinamentu iha Suco Lauana, Sub Distritu Letefoho Distritu Ermera. Treinamentu ne'e realiza bázeia rekomedasaun husi polísia Eskuadra Letefoho tanbá kazu violénsia bázeia ba jéneru numeru as tebes iha área refere. Partisipante sira ne'ebé tuir treinamentu ne'e kompostu husi Xefe Suco, Xefe Aldeia, Grupu Feto, Grupu Joventude inklui estudante husi UNPAS ne'ebé halo estajiu iha Suco ida ne'e. Total partisipante sira hamutuk nain 33 ne'ebé konsiste ho mane nain 22 no feto nain 10.

Materia treinamentu ne'e konabá Kódigu Penál no Kódigu Prosesu Penál husi perspektiva vítima violénsia bázeia ba jéneru, Lei Kontra Violénsia Doméstika, Lei konabá Lideransa Komunitária inklui mós padraun internasionál balun ne'ebé mak Timór Léste opta tiha ona.

Diretór Ezekutivu JSMP, Luis de Oliveira Sampaio haktuir katak, *Treinamentu ne'ebé fo ba lideransa komunitária hanesan kontinuasaun ne'ebé maka dahuluk hala'ó ona ho objetivu atu hasa'e sira nia kuiñesimentu konabá prosesu legál ba kazu violénsia bázeia ba jéneru tuir sistema justisa formal iha Timór Léste. Tanbá hare katak Lideransa Komunitária mós iha obrigasaun atu kumpri ka halo tuir sira nia kna'ar ne'ebé mak konsagra ona iha sira nia lei rasik.*

JSMP hanoin katak katak programa treinamentu ne'e hanesan pasu ida importante hodi aktualiza no dizamina informasaun liu-liu ba lideransa komunitária hodi kontribui ba prosesu prevensaun ka eliminasaun violénsia bázeia ba jéneru ne'ebé mak as iha Timór Léste.

Iha parte seluk, Sr. Carolino Madeira, Xefe Suco Lawana, antes atu remata treinamentu nia hato'ó katak, *“ lori comunidade iha suco refere i apresia no agradese teb-tebes prezensa ekipa VSS nian atu fahe informasaun importante konabá lei, liu-liu Lei Kontra Violénsia Doméstika, Kódigu Penál no Kódigu Prosesu Pená. Liutan nia hatutan, sira sente katak informasaun ne'e benefisiu tebes ba sira, nu'udar Lideransa Komunitária hodi bele aplika iha suco laran wainhira infrenta kazu violénsia doméstika, violasaun seksuál inklui kazu krime sira seluk.*

Treinamentu ne'e rasik hetan antusiasmu diak husi partisipante sira ne'ebé maka marka prezensa. Ida ne'e bele nota husi prosesu durante hala'ó treinamentu partisipante sira ativu teb-tebes husu perguntas wainhira sira ladun kumpriende didiak informasaun hirak ne'ebé maka transfere husi treinador. Aliende ne'e partisipante sira mós espera katak treinamentu hanesan ne'e la rohan ba ne'e deit maibé bele mós iha futuru kontinua realiza tan iha nivel aldeia ne'ebé difisil tebes hodi asesu ba informasaun konabá sistema justisa formal.

Iha fatin hanesan, Polísia Eskuadra rekomenda nafatin atu relaiza tan treinamentu iha Suco Katrai Leten Sub Distritu Letefoho tanbá kasu violénsia bázeia ba jéneru akontese makaas iha suco ida ne'e nia laran. Atividade treinamentu ne'e realiza tanbá hetan suporta husi The Asia Foundation liu husi fundu USAID.

Aleinde ne'e iha loron 9 fulan Agostu 2011, VSS mós hetan fiar husi Uma Mahon Salele liu husi Justice Facility hodi fasilita treinamentu iha Suco Lawala, Sub Distritu Tilomar, ho materi ne'ebe hanesan.

Atu hetan informasaun liu tan bele kontaktu direktamente ba:

Luis de Oliveira Sampaio
Diretór Ezekutivu JSMP
Diresaun e-mail : luis@jsmp.minihub.org
Telefone : (+670) 3323882/729579